

四庫全書

史部

欽定四庫全書

史部

唐會要卷九十一至
六

詳校官編修臣溫汝适

編修臣程嘉謨覆勘

總校官降調編修臣倉聖脉

校對官主事臣陳墉

謄錄監生臣葉中桂

欽定四庫全書

唐會要卷九十一

宋 王溥 撰

內外官料錢上

武德已後國家倉庫猶虛應京官料錢並給公解本錢
當司令史番官迴易給利計官員多少分給

貞觀十二年二月諫議大夫褚遂良上疏曰為政之本
在于擇人不正其源遂差千里漢家以明經拜職或四

科辟召必擇器任使量才命官然則市井子孫不居官
吏大唐制令憲章古昔商賈之人亦不居官位陛下近
許諸司令吏捉公解本錢諸司取此色人號為捉錢令
吏不簡性識寧論書藝但令身能估販家足貲財錄牒
吏部即依補擬大率人捉五十貫已下四十貫已上任
居市肆恣其販易每月納利四千一百年凡輸五萬送利
不違年滿受職然有國家者嘗笑漢代賣官今開此路
頗類于彼在京七十餘司引九人更三載後年

別即有六百餘人輸利受職伏惟陛下理致升平任賢
為政或文學高第或諸州進士皆策同片玉經若懸河
奉先聖之格言慕昔賢之廉恥拔十取五量能授官然猶
犯禁違公輒罹刑法況捉錢令史主於估販志意分毫之
末耳目塵肆之間輸錢于官以獲品秩荏苒年歲陛下
能不使用之乎此人習與性成慣于求利苟得無恥莫
蹈廉隅使其居職從何而可將來之弊宜絕本源臣每周
遊人間為國視聽京師寮庶爰及外官異口同詞皆言不便

伏願勅朝臣遣其詳議上納之其月二十三日勅並停
改署胥士七千人以諸州上戶充淮防閣例輸課二年
一替計官員多少分給之二十一年二月七日令在京
諸司依舊制公廨給錢充本置令史府史胥士等迴易
取利以充官人俸

永徽元年四月二日廢京官諸司捉錢庶士其官俸料
以諸州租腳價充

麟德二年八月十九日詔文武五品已上同武職班給仗

宜以掌閑募士充之

咸亨元年四月十二日停給

乾封元年八月十二日京文武官應給防閣庶僕俸料始依職事品其課及賜各依本品

儀鳳三年八月二日詔廩食為費同資于上農歲俸所頒並課于編戶因地出賦則沃瘠未均據丁收物則勞逸不等俾之富教其可得乎永念于斯載懷釐剔如文武內外官應給俸料課錢及公解料度封戶租調等遠

近不均費錢有異輸納簡選於事甚難運送脚錢損費實
廣公解出舉迴易典吏因此侵漁字人之方豈合如此
宜令王公已下百姓已上率口出錢以充防閤庶僕邑
士白直折衝府仗身并封戶內官人俸食等料既依戶
次貧富有殊載詳職務繁簡不類率錢給用須有差宜
具條例并各逐便

光宅元年九月以京官八品九品俸料薄諸八品年年
給庶僕三人九品從二人

長壽三年三月豆盧欽望請輟京官九品以上兩月俸
物以助軍左拾遺王求禮奏曰陛下富有四海足以儲
畜軍國之用何藉貧京官九品俸而令欽望欺奪之臣
竊不取欽望執曰秦漢皆有稅等以贍求禮不識大體
妄有爭議求禮曰秦皇漢武稅天下使虛空以事邊奈
何使聖朝倣習也不知欽望此言是識大體耶遂寢不
行

開元元年七月秘書少監崔沔議州縣官月料錢狀曰

養賢之祿國用尤先稅取齊人未為剥下何用立本息
利皇運之初法商賈之計託本取利以繩富家國乃一
切權宜諒非聖道彛典項以州縣典吏併捉官錢收剩
數多破產者衆散諸編戶本少利輕其於一時或有所便
付本收利惠乃及人然則議國事者亦當憂人為謀恤
下立計天下州縣積數既大抵皆然為害不少且五千
之本七分生利一年所輸四千二百萬等勞費不過五
千在于平人已為重賦富戶既免其徭貧戶則受其弊

傷人刻下俱在其中未若大率羣官通計衆戶據官定料均戶出資常年發賦之時每丁量加升尺以近及遠損有益無合而籌之所增少而不擾簡而易從庶乎流亡漸歸倉庫稍實則當咸出正賦罷所新加天下坦然十一而稅上下各足其不遠乎十年正月二十一日令有司收天下公解錢其官人料以萬戶稅錢充每月準舊分利數給至二十二日省王公以下視品官參佐及五品已上仗身職員十六年十一月十五日勅文武百

官俸料所給物宜依時價給十八年九月四日御史大夫李朝隱奏請薄稅一年稅錢充本依舊令高戶典正捉隨月收利供官人料錢二十二年四月十四日勅京官兼外州都督刺史大都督府長史俸料並宜兩給至天寶二年十一月十六日勅外官兼太守等官俸料兩給者宜停其外官太守兼京官準式親王帶京官任外官副大將軍副大使知軍及知政事京官兼外官知政事據文合兼給者餘並從一處給仍任逐穩便二十四

年六月二十三日勅百官料錢宜合為一色都以月俸
為名各據本官隨月給付其貯粟宜令入祿數同申應
合減折及申請時限並依常式

一品三十一千月俸八千食料一千八百防閣二十千
雜用一千二百文

二品二十四千月俸六千食料一千五百防閣十五千
雜用一千文

三品十七千月俸五千食料一千一百防閣十千雜用

九百文

四品一十一千八百六十七文月俸四千五百食料七百防閣六千六百文雜用六百文

五品九千二百月俸三千食料六百防閣五千雜用五百文

六品五千三百月俸二千三百食料四百庶僕二千二百雜用四百文

七品四千五百月俸一千五百七十食料三百五十庶

僕一千六百雜用三百五十文

八品二千四百七十五文月俸一千三百食料三百庶僕六百二十五文雜用二百五十文

九品一千九百一十七文月俸一千五十食料二百五十庶僕四百一十七文雜用二百文

天寶三年十三日勅郡縣關職錢送納太府等自今已後納當都充員外官料錢不足即取王官料錢分若無員外官當縣分五年三月二十日勅郡縣官人及公廨

白直天下約計一載破十萬丁已上一丁每月輸錢二百八文每至月初當處徵納送縣來往數日功程在于百姓尤是重役其郡縣白直計數多少請用料錢加稅充用其應差丁充白直望請並停一百姓准卒二省國家丁壯十四年八月四日詔文武九品以上官員既親職務可謂勤心自今已後每月給俸食料雜防閣庶僕等宜十分加二分其同正官加一分仍永為常式至德二年已後內外官並不給料錢

乾元元年外官給半料與職田不給料仍勅度支使量
開劇同給手力課員外官一切無料至二年九月五日
詔京兆無俸料桂玉之費將何以堪宜取絳州新錢給
冬季料即仰所由申請計會支給其艱難之際國家是
同項者給在軍戎所以久虧祿俸眷言憂恤恒愧于懷
今甫及授衣畧為賙給庶資時要宜悉朕懷

大歷十二年四月二十八日度支奏給京百司文武官
及京兆府縣官每月料錢等具件如後

太師太傅太保太尉司徒司空侍中中書令

每月各一百二十貫

文 中書門下侍郎

各一百貫文

東宮三太左右僕射

各八十貫文

東宮三少

各七十貫文

尚書御史大夫太常卿

各六十貫文

常侍

宗正卿太子詹事國子祭酒

各五十貫文

左右丞及諸司侍

郎給事中舍人中丞賓客殿中秘書監司農等卿將作

等監

各四十貫文

太子左右庶子太常少卿

各四十貫文

諫議諸

司少卿少監

各三十貫文

國子司業內侍東宮三卿

各三十貫文

郎中侍御史司天監少詹事諸王傅國子博士諭德中

允中舍殿中秘書太常宗正丞

各二十
五貫文

侍御史著作郎

大理正都水使者總監內常侍內納事

各二十
貫文

員外郎

通事舍人起居王府長史

各十八
貫文

監察御史臺主簿補

闕王府司馬司天少監太子典內太常博士主簿宗正

主簿門下錄事中書主書

各十五
貫文

拾遺司議太子文學

秘書著作佐郎國子太學四門廣文等博士大理司直

詹事府丞及諸寺監丞謁者監中書門下主事

各十三
貫文

洗馬贊善諸寺監主簿詹事府司直

各十
貫文

評事

八貫
文

諸

校正

各七
貫文

諸奉御九成宮總監諸王諮議及諸陵令

各六

貫二
百文

城門符寶國子助教六局郎三府掾屬太常侍醫

文學錄事參軍主簿記室諸衛及六軍長史兩市令諸

副總監武庫署令太公廟令

各五
貫三百文

太子通事舍人東

宮寺丞太學廣文助教內坊丞諸直長內寺伯千牛衛

及諸率府長史諸陵丞諸陵署諸王府判司司行溫泉

監尚書都士都水及諸總監丞司天臺丞太子侍醫諸

司上局署令王府國令苑四面副監公主邑司令

各四
貫一

百一十
六文

國子四門助教律醫學博士協律郎內謁者諸

衛六軍左右衛率府等衛佐諸王府參軍太農都省兵

吏禮考功主事春坊錄事司行副監諸司中局署令都

水主簿諸司上局署令及監廟邑司丞司天臺靈臺郎

保章挈壺正太常針醫監尚藥局司監

各千四百七十文

太祝

奉禮省中諸行主事門下典儀御史臺殿中秘書內侍

省春坊詹事府主事諸寺監諸衛六軍諸司錄事諸司

中局署丞及大理獄丞諸司監作監事諸率府錄事殿

中書醫佐食醫奉輦司庫司廩奉乘鴻臚寺掌客司儀
太僕寺主乘內坊典百一司天臺司辰司歷監內侍府
宮教博士東宮三寺主簿太常大樂鼓吹丞醫正案摩
咒禁卜筮博士及針醫卜助教國子書等宴士及助教
諸王府國丞尉諸總監主簿

各一千九百一十七文

武官左右金

吾衛大將軍

各四十貫文

六軍大將軍左右金吾將軍

各三十貫

文諸衛及六軍中郎諸率府率副

各二十貫五百六十文

諸衛及

六軍郎軍將諸王府典軍副典軍

各九千二百文

諸衛及六軍

司陞千牛及左右備身

各五千三百文

諸衛及六軍中候太子

千牛

各四千一百一十六文

諸衛及六軍司戈太子備身

各二千四百一

十五文

諸衛及六軍執戟及長上

各一千九百一十七文

京兆及諸

府尹

各八十貫文

少尹兩縣令

各五十貫文

奉先昭應醴泉等縣

令司錄

各四十貫文

畿令

各四十貫文

判司兩縣丞

各三十貫文

兩縣

簿尉奉先等縣丞

各三十貫文

奉先縣簿尉諸畿令

各二十貫文

畿

簿尉

各二十貫文

參軍文學博士錄事

各二十貫文

應給百司正員文武官月料錢外官員准式例合支給

料錢如後

檢校官同中書門下平章事

每月一百一十貫文准大
曆十二年六月七日勅檢

校官同中書門下平章事
并同正官例就一高處給

殿中省進馬

准開元十七年
五月十四日勅

置每人准二月納料錢
一千九百一十七文

僕寺進馬

與殿中
進馬同 每月
四十

五貫

省監

與諸少
監同

度支奏約加一十五萬六千貫文准

舊給都當二十六萬貫文來伏望准數起六月一日給

付勅旨依仍令所司起五月一日支給待豐年無事即

准常式處分至六月七日戶部侍郎判度支韓滉奏准

今年四月二十八日恩勅如京文武官九品已上貞元
官月俸其目中書門下平章事不帶正官勅內無額應
檢校官同中書門下平章事並請同正官例就一高處
給勅旨依

建中二年閏正月四日文武百官每月料錢一百貫以
上者三分減八掌輦太僕主乘寺典乘軍衛率府親勳
翊府兵曹典膳兩令司天臺司農司歷監候內坊典直
內侍省官教博士太常侍樂正及醫卜正九品陵廟丞

苑四面監丞王府國丞尉按摩咒禁卜筮博士及針醫

助教諸總主簿國子書等及律助教

各三千文

八百五十

二員武官七十二員四品

各十七千三百五十文

一百三十六員

五品

各一十三千八百文

九十六員六品

各七千九百五十文

九十八員七

品

各六千一百七十四文

一百三十六員八品

各五千七百一十二文五分

五百

五十八員九品

各三千八百五十文五分

並雜給校簿每貫加五百

文支給一十六員諸衛上將軍左右衛本料各六十千

加料四等

每月各糧米七斗鹽七合五勺手力七人資二千五文私馬五匹草三百束料九石七斗

五升隨身十五人糧米九石鹽一斗一升二合五勺春
衣布一十五端絹二十疋冬衣絕紬一十五疋絹三十
疋綿三
十屯 二員左右金吾衛 上並准 一十二員左右武衛等

本料三十五千加糧料等

每月手力五人資六千五百
私馬四匹草二百三十束料

六石六斗隨身一十三人糧米七石八斗春衣布十三
端絹二十四疋冬衣絕紬十三疋絹二十六疋綿二十

四 一十六員諸衛大將軍左右衛左右金吾衛本料四
屯

十千五百續加等

以上准隨衣一人
隨物隨人減料

左右武衛等雜衛

本料三十六千文續加等

每月手力各四人資六千文
私馬三匹草一百六十束料

四石九斗五升隨身十人糧米六石春衣
布一十疋冬衣絕紬十疋綿二十七屯

三十員諸衛

將軍左右金吾衛本料三十六千續加

准上

左右武衛等

雜衛本料三十六千續加等

每月手力各二人資四千五百私馬兩匹草一百一

十束料三石二斗隨身八人糧米四石八斗春衣布八端絹十六疋冬衣絕絢八疋綿一十六屯

六員

統軍本料各六十五千加續等

春衣一付每月糧米六斗鹽七合五勺私馬五

匹草糧隨金吾同金吾隨身餘准諸衛上將軍

六員大將軍本料六十千文續

加

并准諸衛六軍將軍本料三十千續加

准左武等雜衛將軍

射

生神策大將軍本料五十六千文續加

私馬五匹草糧准上隨身十四

人七人給衣不給糧七人給糧米四石五斗鹽一斗五升春衣布十四疋絹二十八疋鞋十重冬衣絕絢十四

疋絹二十八疋
綿二十八屯

射生神策將軍本料三十千文續加

私馬

二匹草料准上隨身十四人六人給衣不給糧八人全
給糧米三石六斗鹽九升春衣布十二端絹二十四疋

鞋十二重冬衣絕紬十三疋
絹二十四疋綿二十四屯

京兆府縣官

准兩縣簿尉
檢五千文餘

并同大歷十年四月
二十八日勅

右中書門下准去年十一月二十八

日勅京官宜加料錢准勅商量謹條件如前勅旨依其

年五月中書門下奏得蘇州刺史兼御史大夫知臺事

李涵東都河南江淮山南等道轉運使兵部兼御史大

夫劉晏戶部侍郎專判度支韓滉守狀釐草諸道觀察

使團練及判官錢觀察使

令魚使不在加給限

每月除刺史正俸

料外每使每月請給一百貫文雜給准時價不得過五

貫文都練使副使每月料錢八十貫文雜給准時價不

得過三十貫文觀察判官

與團練判官同都

每月料錢四十貫

文准官每月料錢三十貫文巡官准觀察推官例已上

每員每月雜給准時估不得過二十貫文如州縣見任

官充者月給料雜給減半刺史知軍事每月除正俸外

請給七十貫文如帶別使不在加限雜給准時估不得

過二十貫文州縣給料

其大都督府長史准七府尹例左右司准上州判駕例支給料

錢

刺史八十貫文別駕五十五貫文長史司馬各五十

貫錄事參軍四十貫判司三十貫參軍博士各一十五

貫錄事市令各一十三貫縣令四十貫丞三十貫尉簿

各二十貫右謹具條件如前其舊准令月俸雜料紙筆

執衣白直值納資諫等色并在此數內其七府准四月

二十八日勅文不該者並請依京兆例處分其中州中

縣已下三分減一分其額內釐務比正官減半其州縣

官除差充推官巡官及司馬掌軍事外如更別帶職亦不加給限勅旨依

建中四年正月宰臣常袞與同列楊綰道不同先是百官俸料寡薄綰與袞奏請加之韓滉判度支袞與滉各騁私懷所加俸料厚薄由已舊時諸少列各定月俸料為三十五千滉怒司業張參惟止給三十千袞惡少詹事趙堪給二十五千又太子洗馬視司經局長官文學為之貳袞有親戚任文學者給二十千而給洗馬十千

其輕重任情不通時政多如此類

興元元年十二月詔京百官及畿內官料俸准元數支給自幸奉天後運路阻絕百官俸料或至闕絕至是全給

貞元三年六月中書侍郎同平章事李泌奏加百官俸料各具品秩以定月俸隨曹署閔劇加置手力資課雜職等議者稱之十年二月詔應文武朝官有薨卒者自今已後其月俸料宜皆全給仍更准本官一月俸錢以

為賻贈若諸三品已上官及尚書省四品官仍令有司
舉舊令聞奏行弔祭禮務從優備初左庶子雷咸以是
月朔卒有司以故事計其月俸以日數給之上聞之故
有是命十五年十二月詔今年十月三日權減諸道諸
州刺史判軍事料及專知別當官加手力課并減州縣
官手力門倉庫獄囚子驛館廨宇等錢宜一切卻仍舊
初獻計者言收諸道軍事錢及手力資課等當得百數
十萬貫可以助軍于頓時判度支贊成之及算計大數

止于三十萬貫而數中更有耗折雜破纔得十餘萬貫
輿議甚以為不便韋舉張建封又相次上言所得甚微
所失體大又用此人心頗不安故令復古

元和六年閏十二月勅河東河中鳳翔易定四道州縣
殘破俸給至微吏曹注官將同北遠在于物體切要均
融宜以戶部錢五萬五千貫充加四道州縣官課七年
五月加賜澤潞磁邢洺五州府縣官料錢二萬貫文其
年十二月以麟坊邠三州官吏近邊俸薄各賜料錢其

年中書門下奏國家舊章依品制俸官一品月俸三十千其餘職田祿米大約不過千石自一品以下多少可知艱難以來網禁漸弛于是增置使額厚請俸錢故大歷中權臣月俸有至九十貫者列郡刺史無大小給皆千貫常袞為相始立限約至李泌又量其閒劇隨事增加時謂通濟理難減削然有名存職廢額去俸存閒劇之間厚薄頓異將為定式須立常規制從之乃命給事中段平仲中書舍人韋貫之兵部侍郎許孟容戶部侍

郎李絳等詳定減加從之十二年四月勅京百官俸料從五月以後並宜給見錢其數內一半先給元估足段者即據時估實數迴給見錢其年十一月勅工部尚書邢士美以疾未任赴京宜就東都將息疾損日赴任其料錢準上官例令有司支給十三年六月以德棣滄景四州值遭水潦給復一年遂定四州官吏俸錢料刺史每月一百五十千望緊上縣令每月四十千餘有差十四年四月重定淮西州縣俸祿以蔡州為緊刺史月俸

一百八十千申光州為中刺史月俸一百五十千長史
已下有差十五年六月刺曰朕聞帝王所重者國體所
切者人情苟得其體必臻于太和如失其情是由于小利
況設官求理頒祿責功既有常規寧宜就減近者以每
歲經費糧入外官俸料據數抽貫朕再三思度中所未
安念彼遐方或從卑官一家所給三載言歸在公當甘
于廉潔受祿又苦于減尅待我庶吏豈其然乎雖憂國
之誠固須瞻助而恤人之慮將起怨咨必若水旱為虞干

戈未戢事非獲已亦何辭今則幸遇豐登八方寧謐
九州之內永絕妖氛三邊之土冀除烽警自宜尅已以
足用安可剥下而謀安臨軒載圖實所增愧其度支所準
五月二日勅應給用錢每貫抽五十文都計一百五十
萬貫文並宜停初宰相以國用不足故權請抽減諫官
及言事者累陳表章以為非便故復下此詔以罷之

唐會要卷九十一

欽定四庫全書

唐會要卷九十二

宋 王溥 撰

內外官料錢下

長慶二年十月勅司徒兼中書令韓弘疾未全平尚須在假將息其俸料宜從勅下日便令所司支給四年五月勅近日訪聞京城米價稍貴須有通變以公濟私宜令戶部應給百官俸料其中一半合給段匹者迴給官

中所糶粟每斗折錢五十文其段疋委別貯至冬糶粟填納太倉時人以為甚便

太和四年七月吏部奏應比遠道州縣官課料錢請令依元額課料支給不得更有欠折勅旨依奏是月又勅應外任官帶一品正京官縱不知政事其俸料宜付所司並令兼給七年二月戶部侍郎庾敬休奏應文武九品已上每月料錢一半合給段疋絲綿等伏以自冬涉春久無雨雪米價少貴人心未安自德音放免逋懸

賑恤貧戶中外羣庶已感皇慈至于衣冠之家素乏儲蓄
朝夕取給猶足為憂以臣愚見若令本官料錢內一半
停給段疋絲綿等迴給太倉粟每斗計七十文在衆庶
必見懽康于公家無所虧減待至麥熟米價稍賤即依
前却給段疋等酌于事理庶叶變通勅旨宜依八年八
月劍南東川觀察使楊嗣復奏管內普合渝三州刺史
元請料錢每月各四十五貫請各添至六十貫勅旨依
奏九年六月勅宰相俸料宜依元和十四年以前舊例

並給見錢

開成二年八月戶部侍郎李班奏京諸司六品以下官請假往外府違假不到本官停給料錢勅旨違限停俸料餘依準令式四年三月勅侍講學士魚太子少師王起宜兼給料錢五年三月中書門下奏準今年二月八日赦節文應京諸司勅留官令本處刻留手力雜給錢與攝官者臣等檢詳諸道正官料俸錢絕少雜給手力過多今正官勅留亦管公事俸入多少事未得中臣等

商議其料錢雜給等錢望每貫割留二百文與攝官其職田祿米全還正官從之

會昌二年中書門下奏河東隴右廊坊邠等道同北遠官加給課料河東等道或興王藩邦或陪京近地州縣之職人合樂為祇緣俸課寡薄官同北遠伏準元和六年閏十二月十二日及元和七年十二月二十日勅河東鳳翔麟坊邠州易定等道令戶部加給課料錢共當六萬二千五百貫文曹省出得平流官數百員時議

以為至當自後訪聞戶部聽給零碎兼不及時觀察使
以其虛折皆別將破用徒有加給不及官人近地好官
依前北遠臣等商議伏望今日以後令戶部與實物仍
及時支遣諸道並委觀察判官專判此案隨月加給官
人不得別將破用如有違越觀察判官遠貶觀察使奏
取進止選人官成後皆于城中舉債到任填還致其貪
求罔不由此其今年河東隴西麟坊邠州新授北遠官
等望許連狀相保戶部各借兩月加給料錢至任

内外官職田

闕原

五品以上田各得十畝四品以
上田各得十二畝五品以下各得田八畝四品以下各
得田十一畝一品各得田三十畝二品各得田二十五
畝三品各得田二十畝六品以下得田七畝六品以上
各得田八畝七品各得田五畝七品以下附内閣殿宇

勅俸以上俱內官

貞觀元年秋七月勅刺史頒行天下凡屬外任官員田
依職授田凡一品各得田四十畝二品各得田三十畝
三品各得田二十五畝四品各得田二十畝五品田同
四品六品各得田十八畝七品各得田十五畝七品以
下附一品內授俸銀四兩穀十二擔

景龍四年春三月勅旨頒行天下凡屬文武官員五品
以下各加田五畝五品以上各加田四畝

長慶元年十月勅司馬兼中書令合屬內官各依舊外
再加田五畝七品以下仍舊

唐會要卷九十二

欽定四庫全書

唐會要卷九十三

宋 王溥 撰

吐突厥上

高祖初起義兵晉陽劉文静請與突厥相結資其士馬以益兵勢從之自為手啟遺始畢可汗云欲舉義兵迎主上若能與我俱南願勿侵暴百姓若但和親坐視受寶貨亦惟可汗所擇始畢得啟謂其臣曰隋主為人我

所知也若迎以來必害唐公而擊我無疑苟唐公自為天子我當以兵馬助之即復書將佐皆請從突厥言帝不可裴寂乃請尊隋主為太上皇立代王為帝以安隋室旗幟雜用絳白以示突厥帝曰此掩耳偷鈴然逼于時事不得不然乃許之煬帝十三年六月遣使如北突厥突厥遣康鞘利等送馬千匹許發兵送帝入關帝受書命劉文静報突厥以請兵帝私謂文静曰突厥貪利無親本不足恃我所以欲得之者恐劉武周引之為患

又蕃馬行牧不費芻粟聊欲藉為聲援數百人之外無所用之八月帝克臨汾絳郡劉文靜以突厥兵至遂下韓城帝即位之五月突厥遣使來時突厥強盛自契丹室韋西盡吐谷渾高昌諸國皆臣之又恃功驕倨每遣使至多暴橫帝亦優容之

武德元年八月遣鄭元璫以女妓賂始畢可汗始畢遣使來報帝宴之升引御座以寵之

二年二月始畢死其弟處羅可汗立八月梁王師都與

突厥合數千騎寇延州總管段德操擊破之十一月師都請為鄉導謀大舉入寇是月處羅死其弟頡利可汗咄苾立

三年五月頡利恃其士馬雄盛有憑陵中國之志又王世充說之曰昔啟民奔隋賴文帝力有此土宇子孫享之宜奉楊政道

楊帝孫

伐唐以報文帝之德頡利然之求

請無厭言辭驕慢至是寇汾陽

四年三月頡利遣使送鄭元璠等還先是處羅與劉武

周冠并州遣元璠往說之不從未幾處羅死疑璠毒之
留不遣又遣漢陽公環使頡利欲令環拜不屈亦留之
復遣使賂頡利且許結婚遂遣使送還

六月冠定州八月冠并州遣鄭元璠詣頡利責以負約
因說以得唐地不能居虜掠所得皆入國人於可汗何
有不如還師脩好坐受金幣孰與棄昆弟積年之歡結
子孫無窮之怨頡利悅引兵還

七年閏七月秦王世民引軍駐於幽州頡利突利二可

汗率萬騎奄至城西秦王帥騎馳詣其陣告之曰國家與可汗和親何為負約深入我地我秦王也能闔獨出與我闔若以衆來我直以此百騎相當耳頡利不應又遣騎前告曰爾往與我盟有急相救今乃相攻何無香火之情耶頡利既見秦王輕出又聞香火之言疑突利與王有謀乃遣止之曰王不須渡我但欲申固盟約耳兵少却後雨久其弓筋膠俱解秦王潛師夜進頡利大驚乃請和親

九年秋七月頡利寇邊先是與突厥書用敵國禮帝欲改用詔勅突厥遂寇靈相潞沁韓朔等州張瑾全軍沒溫彥博亦為所執靈州都督任城王道宗擊破之請和而退

貞觀二年四月頡利以薛延陀回紇等叛遣突利討之敗還頡利拘而撻之突利怨表請入朝

十一月突厥北邊多叛頡利歸薛延陀共推其俟斤奚男為可汗奚男不敢當上方圖頡利乃遣使間道冊奚

男為真珠昆可汗奚男建牙於大漠之鬱督軍山下回紇援野古阿跌同羅僕骨霄諸部皆屬遂遣弟入貢

三年十一月頡利因薛延陀之封大懼始遣使稱臣請尚公主代州都督張公謹上突厥可取六狀乃命李靖為行軍總管討之公謹為副突厥俟斤九人及拔古僕骨同羅奚渠長並率衆來降復以李靖等分道出擊十二月突利入朝太宗喜曰朕治安中國遠人自服豈非上策乎

四年二月李靖襲破突厥于陰山頡利遁依沙鉢羅設
蘇尼失部落王道宗引兵逼之使蘇尼失執頡利張寶
相取之以獻蘇尼失舉衆降漠南遂空

十年正月突厥阿史那社爾降社爾處羅之子年十一
以智畧聞處羅以為拓設建牙於磧北頡利亡西突厥
亦亂社爾詐之襲取其地幾半衆十餘萬乃曰破我國
者薛延陀也我當報仇擊滅之諸部皆諫不從大敗遂
率衆降

十三年四月突利之弟結社率衆降授為中郎將久不
進秩陰結故部落四十餘人夜襲御營孫武開等帥衆
擊之盜馬壯走追斬之

七月自結社之反羣臣皆言留河南不便乃賜懷化
郡王阿史那思摩姓李氏立為泥孰俟利苾可汗賜鼓
纛使率其種落突厥咸憚薛延陀不肯出塞上賜延陀
璽書言前破突厥止為頡利為百姓今冊還其故國爾
薛延陀受冊在前突厥受冊在後當以先後為大小如

敢抄掠發兵問其罪薛延陀奉詔乃遣王孝恭等齎冊立之

十八年十一月突厥俟利苾北渡河延陀惡之數相攻擊俟利苾有衆十萬不能撫御悉南渡河請處勝夏之間許之羣臣言陛下方遠征遼左而置突厥於河南距京師不遠豈得不為後患上曰夷狄亦人以德治之可使如一家且彼不北走延陀而歸我其情可見俟利苾既失衆輕騎入朝

二十一年冬十一月突厥車鼻遣使入貢車鼻本頡利
同族頡利敗諸部欲立之薛延陀方強不敢當率衆歸
之延陀因其有勇略恐為後患欲殺之車鼻逃建牙金
山之北餘衆稍歸之及延陀敗車鼻勢益張遣子入貢
又請入朝遣使徵之卒不至正月遣驍衛郎將擊車鼻
車鼻本無罪帝因安市班
師欲立奇功以雪耻耳

永徽元年九月遣高侃擊車鼻侃至阿息山車鼻發諸
部兵皆不應遂以百騎走侃追獲之送京師諸部盡內

附置單于瀚海二都護府十都督二十二州分統之自是北邊無寇三十餘年

咸亨元年三月勅突厥豪長子弟給事東宮

調露元年十月單于大都護府突厥阿史德溫傳奉職二部俱反立阿史那泥孰匐為可汗一十四州豪長皆叛衆數十萬遣蕭嗣業等討之屢捷會大雪突厥襲其營乃為所敗

永隆元年三月以裴行儉為定襄道大總管將兵以討

之大破於黑山擒奉職泥孰匐為其下所殺以首來降
開耀七年阿史那伏念自立為可汗與阿史德溫傳通
連兵為寇詔復以行儉為大總管曹懷舜副之引兵討
伏念先遣裨將程務挺掩金牙襲獲伏念妻子輜重伏
念北走又使務挺等追躡之伏念遂執溫傳以降餘黨
悉平歸斬伏念溫傳於都市

永淳元年十月突厥餘黨阿史那骨篤祿阿史德元珍
等招集亡散寇并州代州都督薛仁貴將兵擊之始以

仁貴流象州死矣及免胄示之面乃失色下馬列拜引去仁貴因奮擊大破之

弘道元年二月突厥寇定州圍單于都護府五月寇蔚州

唐會要卷九十三

欽定四庫全書

唐會要卷九十四

宋 王溥 撰

北突厥下

嗣聖三年九月以突厥斛瑟羅為繼往絕可汗四年七月骨篤祿寇朔州武后遣黑齒常之等擊之骨篤祿走磧北六年九月武后以僧懷義討之十年九月骨篤祿死弟默啜五十一年三月復遣僧懷義討默啜十二年

十月默啜遣使請降

十四年三月默啜請為其女求昏武后遣嚴知微等冊為遷善可汗其先降者處于豐勝靈夏朔代六州至是默啜求之乃悉驅降戶歸之并許其昏由是默啜益強盛

十五年八月太后以武承嗣子延秀入突厥納其女默啜謂知微等曰我世受李氏恩欲以女嫁李氏安用武氏兒聞李氏惟兩兒在我將兵輔立之以知微為南面

可汗發兵寇媯澶等州移書曰我可汗女當嫁天子兒
武小姓罔冒為婚我為此起兵欲取河北耳九月陷趙
州武后以帝為皇太子河北道元帥狄仁傑副之將兵
討默啜北遁追之不及

十六年十月默啜立其弟咄悉匐為右廂察骨篤祿子
默矩為左廂察各主兵二萬餘其子匐俱為小可汗位
在兩察上主處木昆等十姓兵四萬餘又號為拓西可
汗

十八年七月默啜寇鹽夏遂寇并州遣薛季昶等禦之
神龍二年十二月默啜寇鳴沙進寇原會等州掠隴右
牧馬萬餘匹而去詔訪羣臣禦寇計策

景龍二年十一月突厥施烏質勒卒子娑葛自立為可
汗故將闕啜忠節不服數相攻擊遣馮嘉賓持節安撫
忠節呂守素處置四鎮以牛師獎為西安副都護發甘
涼兵兼徵吐蕃以討娑葛忠節逆嘉賓於討舒河口娑
葛遣兵襲之擒忠節殺嘉賓守素牛師獎與娑葛戰敗

遂陷西安斷四鎮路遂赦娑葛立為可汗三年七月娑葛遣使請降

景雲二年正月默啜遣使請和遣和逢堯使突厥逢堯說默啜曰處宓堅昆間可汗結昏於唐皆當歸附何不襲唐冠帶使之聞之默啜許訥明日幞頭紫衫再拜稱臣

開元三年默啜既請和稱臣於是復圓社庭九月遣薛訥討之四年六月默啜為拔曳固斬首來降

九年三月突厥毘伽遣使求和帝賜書諭之曰果有誠心則共保遐福不然無煩使者往來若仍侵邊亦有以待之其審圖之

十五年九月吐蕃寇瓜州遣突厥毗伽書欲與俱入寇毗伽獻其書於朝上嘉之聽於西受降豆市于是遣使入貢

二十二年十二月毗伽為其臣梅錄唆毒死子登利立二十九年七月登利從叔二人分典兵馬號左右察登

利惡其專誘右察斬之左察判闕特勒攻殺登利骨咄
葉護自立為可汗

天寶元年秋七月突厥拔悉密回紇葛邏祿自為左右
葉護餘衆共立判闕特勒之子為烏蘇可汗朔方節度
使王忠嗣說拔悉密等攻之烏蘇遁去突厥西葉護阿
布思等帥餘衆千餘帳相次來降突厥由是遂微弱

三載八月拔悉密攻殺突厥烏蘇可汗國人立其弟為
白眉可汗於是勅忠嗣乘亂破其左廂十一部會回紇

葛邏祿共攻拔悉密頡跌伊施殺之回紇骨力裴羅自立為骨咄祿毗伽闕可汗上冊拜裴羅為懷仁可汗四載正月懷仁為白眉所殺其子摩延啜立自號葛勒可汗

西突厥

西突厥曷娑那可汗入朝于隋留之國人立其叔父射匱可汗射匱者達頭之孫既立拓地東至金山西至海遂與北突厥為敵建庭於龜茲北三彌山射匱卒弟統

葉護可汗立勇而有謀北并鐵勒控弦十萬據烏孫故地又移庭於石國北千泉西域諸國皆臣之葉護各遣人督征賦

武德元年八月以西突厥曷娑那可汗為歸義王曷娑那獻大珠帝曰珠誠至寶然朕寶王赤心珠無所用之竟還之

二年八月曷娑那在長安北突厥遣使請殺之不許羣臣皆曰保一人而失一國後必為患秦王曰人窮歸我

殺之不義久之引曷娑那入內殿既而送中書省縱北突厥使者殺之

八月西突厥高昌各遣使入貢

八年夏四月統葉護遣使請昏帝問裴矩矩對曰今北寇方強國家且當遠交而近攻臣謂宜許其昏以威頡利俟數年之後徐思其宜上從之

貞觀八年十月西突厥咄陸可汗死其弟沙鉢羅咄咄
利立

十二年十二月西突厥分為十部每部豪長各賜一箭
謂之十箭又分左右廂左廂號五咄亦置五大啜右廂
號弩失畢置五大俟斤通謂之十姓至是咄利失失衆
心為其臣所逐遂走焉者尋復得其故地西部遂立欲
谷設為乙昆咄陸可汗中分其地

十三年十二月西突厥咄利失可汗死子乙昆沙鉢羅
護立號南庭咄陸為北庭

十五年五月咄陸可汗殺沙鉢羅可汗

十六年咄陸既并沙鉢羅之衆自恃強盛遣兵寇伊州
安西都護郭孝恪擊破之是年咄陸擊破米國不分所
獲與其下又斬其將泥孰啜泥孰啜部將胡祿屋襲擊
之咄陸走保白水湖城所部詣闕請廢之上遣使立莫
賀咄之子為乙毗射匱可汗率諸部擊咄陸敗之使人
招其故部落皆曰使我千人戰死一人獨存亦不汝從
咄陸自知不為衆附乃奔吐火羅

十九年六月乙昆射匱可汗遣使入貢且請昏許之使

割龜茲于闐踈勒朱俱波葱嶺五國以為聘禮

二十二年四月葉護賀魯來降咄陸既弃吐火羅部落
亡散其葉護阿史那賀魯帥其餘衆數千帳內屬詔以
為瑶池都督

永徽三年七月賀魯招集離散廬帳漸盛聞太宗崩遂
叛擊破射匱滅之勝兵數十萬與乙昆咄陸連兵處月
處密及西城諸國多附之進寇庭州攻陷金嶺城詔梁
建方契苾何力發兵及回紇以討之

四年十二月乙丑吐陸死子頡苾達度設號真珠葉護
與沙鉢羅有隙尋為沙鉢羅所併

六年五月屯衛大將軍程知節將兵討沙鉢羅不克

顯慶二年正月遣蘇定方等復擊沙鉢羅定方至曳咥
河西沙鉢羅帥十萬拒戰擊敗之會大雪平地二尺定
方曰彼恃雪深謂我不能進亟追之可及也又斬獲數
萬沙鉢羅脫走趣石國諸部各歸所居乃命蕭嗣業追
獲之遂分其地置崑陵濛陵二都護以彌射為興昔亡

可汗押五咄陸部落步真為繼往絕可汗押五弩失畢
部落

龍朔二年十月勅興昔亡繼往絕二可汗發兵與蘇海
政討龜茲繼往絕素與興昔亡有怨密請海政矯勅收
斬之其部落亡走海政追討平之繼往絕尋死十姓無
主附於吐蕃

三年十月西突厥寇庭州刺史來濟將兵拒之不能禦
遂赴敵死

永淳元年四月阿史那車簿圍弓月安西都護王方翼救之三姓咽頰與車簿合兵拒方翼戰於熱海分遣裨將襲破之擒其豪長三百人西突厥遂平

嗣聖七年十月西突厥十姓自垂拱以來為東突厥所侵掠散亡畧盡繼往絕可汗斛瑟羅收其餘衆入居內地武后以為竭忠事主可汗

二十一年正月周以阿史那懷道為西突厥十姓可汗

西陲突厥

貞觀十二年九月上以薛延陀強盛恐後難制分封其二子皆為小可汗各賜鼓纛外示優崇實分其勢

十五年十一月薛延陀真珠可汗聞將東封竟內已虛我此時取思摩奴如拉朽乃命其子大度設發諸部兵合二十萬擊突厥思摩不能禦率部落入長城保朔州遣使告急詔遣李世勣等分道擊之十二月世勣敗薛延陀於諾真水捕獲五萬餘大度設脫走

十六年十月上謂侍臣曰薛延陀屈強今禦之有二策

苟非發兵殄滅之則與之婚姻以撫之房玄齡曰兵凶戰危臣以為和親便即命兵部侍郎崔敦禮持節使薛延陀許以新興公主妻之

十七年真珠使其姪來納聘獻羊馬契苾何力上言薛延陀不可與昏上曰我許之矣可食言乎何力曰願且遷延勅奚男使親迎彼必不敢來則絕之矣上乃召真珠可汗會禮真珠欲行其臣不可謂往必不返真珠謂天子聖明遠近朝服今親幸靈州以愛主妻我我得見天

子死亦不恨薛延陀何患無君因多以羊馬為聘禮經沙磧耗死過半乃責以聘禮不備絕之褚遂良上疏曰往者天下咸言陛下欲安百姓不愛一女莫不懷德今忽有改悔之心得少失多竊為國家惜之嫌隙既生必構邊患彼國蓄見欺之怒此民懷負約之慚恐非所以服遠人訓戎士也不聽薛延陀本無府庫至是厚歛諸部以充聘財諸部怨叛延陀由是衰弱

十九年九月真珠二子長曰曳莽次曰拔灼初分立為

小可汗至是真珠死拔灼殺其兄曳莽而自立是為多
彌可汗十二月薛延陀寇夏州

二十年正月夏州兵擊薛延陀大破之

二十一年八月多彌猜福好殺廢父時貴臣專用已所
親昵國人不附回紇諸部落擊之大敗上詔王道宗等
將兵擊之國中驚擾多彌出走回紇殺之盡據其地餘
衆西走猶七萬共立真珠兄子咄摩支遣使奉表請居
鬱督軍山之北詔遣使安集之鐵勒九姓豪長聞其來

皆懼朝議亦恐其為磧北之患乃遣李世勣圖之上自
幸靈州招撫之世勣至鬱督軍山吐摩支降道宗兵既
渡磧薛延陀拒戰道宗擊破之遣使招諭鐵勒諸部其
酋長皆喜請入朝駕至浮陽回紇等十一姓各遣使歸
命乞置官司上喜遣使納之詔曰朕聊命偏師遂擒頡
利始弘廟畧已滅延陀鐵勒百餘萬戶請為州郡混元
以降書未前聞宜脩禮告廟仍頒示普天上又為詩曰
雪耻酬百姓除凶報千古勒石於靈州

吐谷渾

初隋煬帝征吐谷渾可汗伏允奔党項煬帝立其質子
順為主不果入會中國喪亂伏允還收其故地仍自稱
為吐谷渾可汗

武德二年二月涼李軌奉書於帝稱從弟大涼皇帝臣
軌帝怒議討之遣使與伏允連和使引兵擊李軌許以
順還之伏允喜起兵擊軌數遣使入貢請其質子順帝
遣還之

四年七月吐谷渾寇洮岷二州遣岐州刺史柴紹救之
為其所圍且乘高射之天下如雨紹遣軍士彈琵琶二
女子對舞衆怪之相與聚觀紹察其無備潛遣精騎出
其陣後擊之衆大潰

八年正月吐谷渾突厥各請互市詔皆許之先是中國
喪亂民乏耕牛至是資於戎狄雜畜被野

貞觀八年十月吐谷渾可汗伏允老耄其臣天柱王用
事數入塞侵盜詔大舉兵討之上欲以李靖為將因其

老不欲重勞之靖聞之請行上大悅以靖為西海道行軍大總管節度諸軍討之

九年五月李靖悉燒野草輕兵走入磧諸將以為馬無草未可深入侯君集曰彼一敗之後鼠逃鳥散取之易於拾芥此而不乘後必悔之靖從之分軍為兩道敗吐谷渾於牛心堆又敗諸赤水源令君集追伏允于烏海與戰大破之靖襲破伏允牙帳伏允子順斬天柱王來降伏允為左右所殺國人立順為可汗詔以為西平王

後順為國人所殺上遣侯君集將兵立其子諾曷鉢為
可汗

十年三月吐谷渾請頒歷遣子入侍

永徽三年正月吐谷渾遣使入貢

咸亨三年二月徙吐谷渾於靈州其故地皆入於吐蕃
乾寧元年六月李克用大破吐谷渾

唐會要卷九十四

欽定四庫全書

唐會要卷九十五

宋 王溥 撰

高昌

高昌者漢車師前王之庭後漢戊巳校尉之故地漢時興師西討軍中羸憊者留居焉地形高敞故因名高昌壘有八城本皆中國人也後魏時為郡以闕爽為太守尋為且渠無諱所奪居數世高昌滅之以燉煌人張孟明

為國王國人殺之共立馬儒又殺之乃立其長史金城
麴嘉為王嘉自云河東人世修職貢於中國有文字知
書計置官亦採中國之號其王伯雅即嘉之六世孫

武德七年獻拂菻狗雌雄各一高六寸長尺餘

中國有拂菻狗

自此始也

貞觀四年其王文泰來朝

泰即伯雅子也

妻宇文氏即隋煬帝

所賜華容公主也請入宗親詔賜姓李氏封常樂公主
其後與突厥連結諸國朝貢者皆路出高昌文泰稍墜

絕之至十三年太宗謂其使曰高昌數年來朝貢脫畧無藩臣之禮今茲歲首萬國來朝而文泰不至我使人至彼文泰云鷹飛于天雉竄于蒿猫遊于堂鼠安于穴各得其所豈不理耶明年當發兵以擊爾也

十四年八月十日交河道行運大總管侯君集副總管牛進達平高昌國下其郡三縣五城二十二戶八千四十六口萬七千七百三十八馬四千三百疋太宗欲以其地為州縣魏徵諫曰未若因撫其人而立其子所謂

伐罪弔民威德被于遐外為國之善者也今若利其土壤以為州縣常須千餘兵鎮守數年一易往來交替死者十有三四遣辦衣資離別親戚十年之後隴右空虛陛下終不得高昌撮粟尺布以助中國所謂散有用而資無用太宗不從以其地為西昌州又改為西州以交河城為交河縣始昌城為天昌縣田城為柳中縣東鎮城為蒲昌縣高昌城為高昌縣併為部護府留軍以鎮之初西突厥遣其葉護屯兵于可汗浮圖城與高

昌為影響至是懼而來降以其地為庭州并置蒲類縣
國威既震西域大懼焉耆王詣軍門請謁留兵鎮守刻
石紀功而還每歲調發千人防邊黃門侍郎褚遂良上
疏曰臣聞古者拓后必先華夏而後夷狄務廣德化不
事遐荒是以周宣薄伐至境而止始皇遠塞中國分離
漢武負文景之聚財翫士馬之餘力始通西域將五十
年復得天馬于宛城采蒲桃于安息而海內空竭生人
物故所以租至六畜算至舟車因之凶年盜賊並起搜

粟都尉桑弘羊復主意請遣士卒達舊輪臺築城以威
西域武帝慨然追悔情發于衷棄輪臺之野下哀痛之
詔人神咸悅海內又康向使武帝復用桑弘羊之言天
下生靈皆盡之矣是以光武中興不踰葱嶺孝章即位
都護來歸陛下誅滅高昌威加西域收其鯨鯢以為州
縣然則王師被發之歲河西供役之年飛芻輓粟十室
而九數部蕭然五年不復陛下歲遣千餘人遠事屯戍
經年離別萬室思歸去者資裝自須營辦既費芻粟停

其機杼經途死亡復在言外兼遣罪人增其防護彼罪人者生于敗肆終朝墮業犯禁違公謂之浮薄徒能擾于邊城必無益于行陣所遣之內復有逃亡官司捕捉為國生事設令張掖塵飛酒泉烽舉陛下豈能得高昌一人升粟而及事平終須發隴右諸州星馳電擊由斯而言此河西者己之腹心彼高昌者他人手足豈得糜費中原以事無用書不作無益害有益此之謂也陛下平頡利于沙塞滅吐渾于西海突厥餘衆為奇渾汗遺

氓更樹君長復立高昌非無前例此所謂有罪而誅之
既復而立之四海百蠻誰不聞見蠕動懷生畏威慕德
宜擇高昌可立者而立之徵給首領兼還本國負戴漢
恩長為藩翰中國不擾既富且寧傳之子孫以貽永世
初平高昌君集至京師有司劾其私取寶物詔下獄中
書侍郎岑文本上疏曰高昌昏迷人神共棄在朝議者
以其地在遐荒咸欲置之度外惟陛下運獨見之明授
決勝之略君集奉行聖算刻期平殄陛下謙而不居乃

推功于將帥露布初至便降大恩從征之人皆霑滌蕩
內外文武咸德陛下賞不踰時不盈數日並付大理雖
君集等自掛網羅恐海內疑陛下惟錄其過以遺其功
古之人君出師命將克敵則獲重賞不克則加嚴刑當
其有功也雖貪殘淫縱必蒙青紫之寵當其無功雖勤
功潔已不免鈇鉞之誅故周書曰記人之功忘人之過
宜為君也昔漢貳師駿馬三十疋雖斬宛王之首而罪
惡甚多武帝以為萬里征伐不錄其過遂封海西侯又

校尉陳湯矯詔興師雖斬郅支單于而湯盜所收康居財物為司隸所繫湯乃上疏曰臣與吏人共誅郅支幸得擒滅今司隸乃收繫按驗是為郅支報讎也元帝赦其罪封湯闕內侯又晉龍驤將軍王濬有平吳之功而王渾苛論濬軍人得皓寶物濬上表曰今年平吳誠為大慶于臣之身更為咎累武帝赦而不推封襄陽侯近隋新義郡公韓擒虎平陳之日縱士卒暴亂取寶宮內帝亦不問罪加上柱國由斯觀之將帥之臣廉慎者少

貪求者衆也古之軍勢曰使智使勇使貪使愚故智者
樂立其功勇者好行其志貪者邀趨其利愚者不計其
死是知前王莫不收人之長弃人之短良為此也陛下
若降雨露之澤收雷電之威錄其微勞忘其大過是使
立功之士因茲而皆勸負罪之將由斯而改節乃釋君
集等先是文泰已死國人立其男智盛為王竟為君集
執獻于觀德殿初其國童謠曰高昌兵馬如霜雪漢家
兵馬如日月日月照霜雪迴首自消滅文泰使人捕其

首唱者不能得麴氏有國至智盛凡九代一百四十四年而滅尋拜智盛為左武衛將軍封金城郡公弟智湛為右武衛中郎將封天山縣公智湛後終于左驍衛將軍西州刺史天授初其子崇裕授左武衛大將軍交河郡王崇裕卒封襲遂絕

高句麗

高句麗者出自扶餘氏其後有蒙孫莫來者滅扶餘都平壤即玄菟之故地俗頗知書記而恒與中國通

武德七年二月七日遣使內附受正朔請頒歷許之八年三月十一日高祖謂羣臣曰名實之間理須相副高麗稱臣以自尊大可即詔述朕此懷也裴矩溫彥博進曰遼東之地周為箕子之國漢時之玄菟郡耳魏晉以前近在提封之內不可許以不臣若與高麗抗禮四方必當輕漢且天朝之于諸國猶日月之于列星理無降尊俯同藩服乃止

貞觀十八年太宗謂侍臣曰高麗莫離支賊殺其主盡

誅大臣用刑有同坑穽夫出師弔伐須有其名因其內
亂而取之為易諫議大夫褚遂良進曰兵若渡遼事須
尅捷萬一不獲無以威示遠方必更發怒再動兵衆若
至於此安危難測太宗然之兵部尚書李勣曰近者延
陀犯邊陛下必欲追擊但為魏徵之諫所以遂用其言
此之失機亦由徵之誤計倘若仰申聖策延陀無一人
生還可五十年間邊境無事至十一月十六日以刑部
尚書張亮為平壤道行軍大總管自萊州泛海趨平壤

又以特進李勣為遼東道行軍大總管趨遼東兩軍合

勢以其月之三十日征遼之兵集於幽州

安州人彭惠通請出布帛

五千段以資征人上嘉之比漢之卜式拜宣義郎

十九年四月李勣攻拔蓋牟城獲口二萬以其城置蓋州五月上渡遼水詔徵橋梁以堅士卒之心上親率甲騎與李勣攻遼東城拔之以其城為遼州六月攻拔白岩城以其城為岩州遂引軍次安市城進兵以攻之會高麗北部靺薩高延壽南部高惠真率靺鞨之衆十五萬

來援于安市城東南八里依山為陣上令所司張受降
幕於朝堂之側曰明日午時納降人于此上夜召文武
躬自指麾是夜有流星墜賊營中明日及戰大破之延
壽惠真率三萬六千八百人來降上將豪首三千五百
人授以軍職遷之內地餘三萬人悉放還平壤城鞬鞬
三千人並坑之獲馬五萬疋牛五萬頭甲一萬領因名
所幸山為駐蹕山命許敬宗為文勒石以紀其功遂移
軍于安市城南久不尅九月遂班師先遣遼蓋二州戶

口渡遼乃召兵馬歷其城中而旋城主昇城拜辭太宗
嘉其堅守賜縑百疋以勸事君者十一月至幽州初入
遼也將十萬人各有八駄兩軍戰馬四萬疋及還死者
一千二百人八駄及戰死者十七八張亮水軍七萬人
沈海溺死者數百人凡渡遼蓋二州戶口五日入內地
前後七萬餘人二十年李勣復大破高麗于南蘇班師
至顯利城渡白狼黃岩二水皆不勝舟楫勣恠二水淺
狹問契丹遼源所在云此二水更行數里即合南流即

稱遠水更無遠源可得也二十二年七月太子太傅知門下省事房玄齡謂諸子曰吾自度危篤以來討不停豈可使吾銜恨壯地遂封表上諫曰臣詳觀方今為中國患者無過突厥遂能坐運神策不下殿堂大小可汗相次束手分典禁衛執戟行間其後延陀鴟張尋就夷滅鐵勒慕義請置州縣沙漠已北萬里無塵如高昌叛渙于流沙吐渾首竄于積石偏師薄伐俱從平蕩高麗歷代逋誅莫能討擊陛下責其逆亂殺王虐人親總六

軍問罪遠碣未經旬日即滅遼東前後虜獲數十萬人
分配諸州無處不滿雪往代之宿恥掩峻陵之枯骨比
功校德萬倍前王此聖主之所自知微臣安敢備記今
臣深為陛下惜之重之愛之寶之周易曰知進退存亡
而不失其正者其惟聖人乎由此言之進有退之義存
是亡之幾得有喪之理老臣所以為陛下惜之蓋謂此
也陛下威名功德亦可足矣拓地開疆亦可止矣彼高
麗者邊夷之賤類不足待以仁義不可責以常理古來

以魚鱉畜之宜從闕略若必欲絕其種類恐獸動則搏
陛下每決死囚必令三覆五奏進素食停音樂蓋以人
命所重感動聖慈也況今兵士之徒無一罪戾無故驅
之于戰陣之間委之于鋒刃之下使肝腦塗地魂魄無
歸令其老父孤兒寡妻慈母望輜車而掩泣抱枯骨而
椎心足以變動陰陽感傷和氣實天下之寃痛也且兵
凶器也戰危事也不得已而用之向使高麗違失臣節
而陛下誅之可也使失百姓而陛下滅之可也久長能

為中國患而陛下除之可也有一于此雖日殺萬夫不足為媿今無此三條坐煩中國內為舊主雪怨外為新羅報讎豈非所存者小所損者大願陛下遵皇祖老子止足之誠保後代巍巍之名發沛然之恩降寬大之詔順陽春以布澤許高麗以自新臣老病三公朝夕入地所恨竟無塵露以增海嶽謹罄殘魂餘息先代結草之誠倘蒙錄此哀鳴即臣死且不朽八月徐充容上表曰竊見頃年已來力役兼總東有遼海之軍西有崑邱之

役士馬疲于甲冑舟車倦于轉輸且召募投我去留懷
生死之病因風阻浪存沒有漂溺之危一夫力耕卒無
數十之獲一船致損則傾數萬之糧是猶運有盡之農
功填無窮之巨浪圖未獲之他衆喪已成之我軍雖除
凶伐暴有國常規然黷武玩兵先哲所戒昔秦王併吞
六國返速危亡之期晉武奄有三方翻成覆敗之業是
知地廣非久安之術人勞乃易亂之原願陛下布澤流
仁矜弊恤乏減行役之煩增湛露之惠

龍朔元年四月十六日兵部尚書任雅相為江道行軍
大總管三十六軍水陸分途先觀高麗之釁上將親率
六軍以繼之蔚州刺史李君球上疏曰臣聞司馬法曰
國雖大好戰必亡天下雖平忘戰必危戰者危事兵者
凶器故聖主明王重行之也憂人力之盡恐府庫之殫
懼社稷之危生中國之患故古人云務廣德者昌務廣
地者亡昔秦始皇王好戰不已至于失國是不愛其內而
務其遠故也漢武遠討朔方始平萬里廣拓南海入部

給符戶口減半國用空虛至于末年方垂哀痛之詔自悔其失彼高麗者僻側小醜潛藏山海之間得其人不足以彰聖化棄其地不足以損天威何至疲中國之人傾府庫之實使男子不得耕耘女子不得蠶織陛下為人父母不垂惻恤之心傾其有限之貲貪彼無用之地設令高麗既滅即不得不發兵鎮守不多兵威不足多發即人心不安是乃疲于轉戍萬姓無聊生則天下敗矣天下既敗即天子何以自安故臣以為征之不如不

征滅之不如不滅惟陛下裁斷焉

乾封元年李勣攻拔無餘城遂與諸軍相會時侍御史賈言忠充支度遼東軍糧使還上問以軍事言忠畫其山川地勢且言遼東可平之狀上問曰卿何以知其平也對曰昔隋主親率六軍覆于遼東者人事然也煬帝無道軍政嚴酷舉國皆役天下離心玄感一唱狼狽而返身死國亡自取之也及先帝親往問罪所以不得志者高麗未有釁也諺曰賊無隙中道迴今高麗已失其

政人心不附男女兄弟相為攻擊脫身來奔為我鄉導
彼之情偽盡知之矣以國家富强陛下明聖將士盡心
滅之必矣且臣聞高麗秘記云不及千年當有八十老
將來滅之自前漢之高麗氏即有國土及今九百年矣
李勣年登八十亦與其記符同又高麗頻歲饑荒賣鬻
男女無故地裂狼狐入城蚡鼠穴于國門之下其俗信
妖迭相驚駭天意如此人事如彼臣竊以為是行不再
舉矣上曰卿觀遼東諸軍孰賢對曰李勣先朝舊臣聖

鑒所悉龐同善雖非鬪將而持軍嚴整薛仁貴勇冠三軍威名遠震高侃勤儉自處忠果有餘契必何力沈毅持重統御之才雖頗有忌前之癖而臨事能斷然諸將夙夜小心忘身憂國者莫逮于李勣上深然其言

總章元年夏四月彗星見于五章許敬宗以為星孛于東北王師問罪此高麗將滅之徵九月李勣拔平壤城虜高藏男建等十二月至新豐詔取使道俘于昭陵乃備軍容奏凱樂獻于太廟詔以高藏政不由己赦其罪

授司平太常伯男產授司宰少卿男建配流黔州分其地置都督府九州三十二縣一百鎮又置安東都護以統之移其戶二萬八千于內地

儀鳳中高宗授高藏遼東都督府封朝鮮王居安東與本蕃為主高藏至安東潛與靺鞨相通謀叛事覺召還配流邛州以永淳初卒贈衛尉卿聖歷二年又授高藏男德武為安東都督以領本蕃自是高句麗舊戶在安東者漸寡少分投突厥及靺鞨等其舊地盡入于新羅

高氏君長遂絕

元和十三年四月其國進樂物兩部

百濟

百濟者本扶餘之別種當馬韓之故地其後有高仇台
為高麗所破以百家濟海因號百濟焉大海之北小海
之南東北至新羅西至越州南渡海至倭國北渡至高
麗其王所居有東西域其所置官有內佐平掌宣納事
內頭佐平掌庫藏事內法佐平掌禮儀事衛士佐平掌

宿衛兵事朝廷佐平掌刑獄事兵官佐平掌兵馬事又外置六方管十郡其用法叛逆者死殺人者以奴婢三人贖罪官人受財及盜者三倍追贓餘多與高麗同

武德四年其王扶餘璋遣使獻果下馬與新羅世為仇讎

貞觀十六年與高麗通和以絕新羅入朝之道太宗親征高麗百濟懷貳數年之間朝貢遂絕至五年八月十三日左衛大將軍蘇定方討平之虜其王義慈及太子

善將校五十八人送于京師其國分為五部統郡三十
七城二百戶七十六萬至是以其地置熊津馬韓東明
金連德安等五都督各統州縣立其酋長為都督刺史
縣令命左衛郎將王文度為都統總兵以鎮之義慈事
親以孝聞友于兄弟時人號為海東曾閔及至京數日
病卒葬于孫皓陳叔寶墓側至麟德三年己後其地為
新羅靺鞨所分百濟之種遂絕

新羅

新羅者本弁韓之地其風俗衣服與高麗百濟畧同而朝服尚白好祭山神國人多金朴兩姓他姓不為婚姻重元日以其日拜日月諸神髮長繞地其先出高麗魏將毋邱儉之破高麗也其衆遁保沃泔後歸故國其留者號新羅

永徽元年新羅王金真德大破百濟遣使金法敏來朝乃織錦作五言太平詩以獻帝嘉之拜法敏為太府卿五年真德卒高宗為舉哀放永光門使太常卿張文收

持節弔祭之贈開府儀同三司仍賜綾綵二百段詔其子春秋嗣位

顯慶元年三月又破百濟兵遣使來告

龍朔元年春秋卒詔以其子法敏嗣位三年四月詔以新羅國置雞林大都督仍授法敏雞林大都督

麟德二年八月法敏與熊津都督扶隆盟于百濟之熊津城且盟百濟僭羅倭人四國使浮海西還以赴太平之約

上元元年二月新羅王金法敏既納高句麗叛亡之衆
又封百濟故地遣兵守之帝大怒詔削法敏官爵遣宰
臣劉仁軌討之仍以法敏弟右驍衛員外大將軍臨海
郡公金仁問為新羅王時仁問在京師詔令歸國以代
其兄仁問行至中路聞新羅降仁問乃還二年二月雞
林道行軍大總管劉仁軌大破新羅之衆于七重城而
還新羅于是遣使入朝伏罪并獻方物前後相屬意復
法敏官爵既盡有百濟之地及高麗南境高麗東西約

九百里南北約一千八百里於界內置上良康熊金武
漢朔溟等州所輸物產為新羅之最

開耀元年法敏卒遣使冊立其子政明為王仍襲父官
爵

長壽二年政明卒冊立其子理洪為王三年遣使來朝
其年理洪卒冊立其弟崇基為王仍令襲兄輔國大將
軍左豹韜大將軍雞林州都督

神龍三年授驃騎大將軍

先天元年改名興光

開元十年頻遣使獻方物十二年興光遣使獻果下馬
二匹牛黃人參頭髮朝霞紬魚牙紬細鏤鷹鈴海豹皮
金銀等仍上表陳謝至十二年遣其臣金武勲來賀正
及武勲迴降書賜之又使其弟金嗣宗來朝并貢方物
至二十一年加興光寧海軍使其年命太僕卿員外置
金思蘭使于新羅思蘭本新羅之行人恭而有禮因留
宿衛及是委以出疆之任且便之也前年帝賜興光白

鸚鵡雌雄各一及紫羅繡袍金銀鈿器物瑞文繡緋羅
五色羅綵綾共三百餘段至興光遣使從姪志廉奉表
陳謝仍奏國內有芝草生畫圖而獻二十年又遣其大
臣金竭丹來賀正又遣姪志廉來獻方物授志廉鴻臚
少卿員外置賜絹百疋留宿衛二十三年十一月遣從
弟大阿食金忠相來朝死於路贈衛尉卿二十五年興
光卒其子承慶嗣位遣使來告帝悼惜之又贈太子太
保命贊善大夫邢璣攝鴻臚少卿往其國行弔祭冊立

之禮至二十八年冊承慶妻朴氏為新羅王妃

天寶三年承慶卒命弟憲英嗣位仍襲開府儀同三司
都督雞林州刺史兼持節寧波軍事是載四月遣使謝
恩并獻方物十月遣使來賀正授庄清道率府員外長
史賜綠袍銀帶放還蕃自後頻來朝七年遣使獻金銀
及六十總布魚牙紬朝霞紬牛黃頭髮人參

寶應二年憲英遣使朝貢授其使校檢禮部尚書放還
大厯二年憲英卒冊立其子乾運為王三年二月命倉

部郎中歸宗敬兼御史中丞持節冊命又冊乾運母為太妃七年遣使金標石來賀正授衛尉員外少卿放還八年遣使來朝并獻金銀牛黃魚牙絢朝霞絢等方物建中四年乾運卒無子國人立其上相良相為王

貞元元年授良相檢校太尉都督雞林州刺史寧海軍使新羅國王仍令戶部郎中蓋損持節冊命其年良相卒立上相敬信為王令襲其官爵信即相之從兄弟也十四年敬信卒其子先敬信亡國人立敬信嫡孫權知

國事俊邕為王十六年授俊邕開府儀同三司檢校太尉新羅王令司封郎中兼御史中丞韋丹持節冊命明年至鄆州聞俊邕卒其子重興立詔丹還

永貞元年詔遣兵部郎中李元先持節冊興為王

元和元年十一月放宿衛新羅王子金忠獻歸本國仍加試祕書監

二年遣使金力奇來朝

其年七月力奇上言奉恩冊臣故主俊邕為王母申氏

為太妃妻叔氏為王妃冊使韋丹至中路知俊邕薨其
冊即廻在中書省令臣還國伏請授臣以歸勅金俊邕
等冊宜令鴻臚寺于中書省受領至寺宣授與金力奇
令奏歸國仍賜其叔昇門戟令本國准例給四年遣使
金陸珍等來朝貢五年其王子金憲章來朝貢七年重
興卒其相金彥昇遣使金昌南等來告哀其年授彥昇
開府儀同三司檢校太尉侍郎大都督雞林州諸軍事
兼持節寧海軍上柱國新羅王彥昇妻朴氏冊命為妃

仍賜其宰相金崇斌等三人戟亦令本國準給兼命職
方員外郎攝御史中丞崔延持節弔祭冊立其質子金
士臣副之十一年十一月其入朝王子金士臣等遇惡
風飄至楚州鹽城縣界淮南節度使李鄜以聞是歲新
羅饑其衆一百七十人求食于浙東十五年遣使朝貢
長慶二年十二月遣使金柱弼朝貢

寶曆元年其子王金明來朝兼充宿衛

太和四年彥昇卒五年四月詔以新羅王金景徽為開

府儀同三司檢校太尉使持節大都督雞林州諸軍事
兼充寧海軍使景徽母朴氏宜冊為太妃妻朴氏冊為
妃太子左諭德兼御史中丞源寂持節弔祭冊立馬
開成元年遣使金義琮來謝恩兼宿衛二年四月十一
日放還蕃賜物有差五年四月鴻臚寺新羅國告哀質
子及年合歸國學生等共一百五人並放還

會昌元年七月勅歸國新羅前入新羅宣慰副使前充
兗州都督府司馬賜緋魚袋金雲卿為淄州長史

唐會要卷九十五

欽定四庫全書

唐會要卷九十六

宋 王溥 撰

契丹

契丹居潢水之南黃龍之北鮮卑之故地君長姓大賀氏勝兵四萬三千人分為八部好與奚鬪死無服紀子孫死父母晨夕哭父母死子孫不哭餘風俗與突厥同武德四年二月遣使貢名馬豐貂

貞觀二十二年豪長窟哥等部落咸請內附又契丹有別部長名孫敖曹者武德四年與靺鞨豪長突地稽俱請內附詔令營州城傍安置至曾孫萬榮通天年中與

妹婿李盡忠殺營州都督趙翹據營州作亂

盡忠本窟哥之婿也

則天怒改萬榮為萬斬盡忠為盡滅尋自稱無上可汗以萬榮為大將及盡忠死萬榮領其衆焉初令曹仁師討之全軍敗績又令王孝傑繼之孝傑沒於陣攻陷冀州俄為奚及突厥掩擊其後張九節設伏以擊之遂單

馬宵遁為其奴斬之開元二年李盡忠從父弟失活請
歸款復封失活為松漠都督授左金吾衛大將軍仍于
其府置靜析軍五年十二月以永樂公主出降失活親
迎之夜遣諸親高品及兩蕃大首領觀花燭六年失活
卒玄宗為之舉哀贈特進冊立其從父弟娑固為松漠
郡王至十年十一月娑固與公主來朝宴于內殿及歸
娑固衛官可突于勇悍得衆娑固欲除之而事泄可突
于攻之娑固奔營州可突于立娑固從父弟鬱于為主

鬱于遣使謝罪玄宗復冊立鬱于令襲安固之位仍赦可突于之罪至十年鬱于朝請婚又封餘姚縣主長女慕容氏為燕郡公主以妻之封鬱于為松漠郡王授左金吾員外大將軍兼靜析軍經畧大使鬱于死立其弟咄于襲其官爵復以燕郡公主為妻十三年咄于復與可突于相猜阻携公主來奔改封遼陽王國人立其弟邵固其冬邵固詣行在從至東嶽拜左羽林員外大將軍改封廣化郡王仍封宗室外甥陳氏女為東華公主

以妻之十八年邵固為可突于所殺以其衆降突厥東
華公主走投平盧軍詔遣信安王禕幽州長史薛楚平等
討之皆不尅二十二年六月幽州節度使張守珪大破
之遣使獻捷勅曰邊境為患莫甚于東隅朝廷是虞幾
煩于將帥積年逋誅一朝剪滅則東方將寢以廓清河
朔之人差寬征戍此皆上憑九廟之靈下賴羣帥之功
今具凱旋敢不以獻宜擇日告九廟所司准式其年十
一月幽州節度使張守珪發兵討契丹斬其王屈列及

其大臣可突于等傳首東都餘衆及叛奚皆散走山谷立其豪長李遇折為契丹王仍授特進封東平郡王其年遇折又為可突于黨泥禮所殺唯一子刺乾走投安東獲免拜左驍衛將軍自後與奚王朝貢歲至蕃禮甚備

貞元四年復犯我北鄙幽州以聞九年十二月遣使朝貢十年正月遣使朝貢其年二月勅幽州道入朝契丹大首領梅落拽河等五人並可果毅都尉次首領王下

詔活薛爾君等一十六人並可別將放還國十一年十月契丹大首領熱蘇等二十五人來朝

元和八年遣使朝貢九年十一月契丹大首領梅落鵲劣來朝十年十一月契丹遣使梅落饒劣等十九人來朝貢十二年十一月契丹首領介落等朝貢以告身一十九通賜其貴人

長和九年十一月契丹大首領二十九人來朝賜物各有差

開成元年十一月契丹大首領涅列壞等三十一人來朝四年十二月契丹大首領薛葛等三十人來朝

會昌二年九月制契丹新立王屈戌可雲麾將軍守右武衛將軍員外同正幽州節度使張仲武奏契丹新立王屈戌等云契丹舊用迴鶻印今懇請當道聞奏乞國家賜印伏望聖慈允許勅旨宜依乃以奉國契丹之印為文

奚

奚蓋匈奴之別種所居亦鮮卑之故地在京師之東北
勝兵三萬分為五部每部置俟斤風俗與突厥同通天
年中契丹叛奚亦臣屬突厥兩國常為表裏號為兩蕃
景雲元年其王李大輔遣使貢方物

開元五年大輔入朝封饒樂郡王仍授為左金吾員外
大將軍詔封外甥女辛氏為固安公主以妻之其年大輔與
契丹首領李失活請復置都督府許之大輔卒弟魯蘇
立十年詔魯蘇襲其兄官爵又封咸安公主之女韋氏為

東光公主以妻之十四年改封魯蘇為奉誠王後為契丹衙官可突于所脅走投榆關移其部落于幽州界安置五載又封其王娑固為昭信王仍授饒樂都督自大厯後朝貢時至

貞元四年七月奚及室韋寇振武十一年四月幽州奏破奚六萬餘衆

太和元年其王饒樂府都督襲歸誠王梅落來朝加檢校司空放還蕃三年以奚首領索低為右武威衛將軍

允檀薊兩州遊奕兵馬使仍賜姓李氏八年遣使朝貢
十一年遣使獻名馬是後每歲至今朝貢不絕或歲中
三至故事嘗以范陽節度使為押奚契丹兩蕃使自至
德後其蕃臣多擅封壤每優容之彼務自完不生邊事
故二蕃亦少為寇其每歲朝賀常各遣數百人至幽州
則選其豪長三五十人走闕引見于麟德殿賜以金帛
遣還餘皆駐而館之率以為常

室韋

室韋者契丹之別種附于突厥用角弓楛矢尤善射時聚弋獵事畢而散其人土著無賦稅人牽犁以種又按隋書室韋記云室韋有五部落一南室韋二北室韋三鉢室韋在北室韋之北四深莫怛室韋在北室韋之西北五大室韋在室建河之南深莫怛室韋之西北隋書曰大室韋之外名字改易不可詳悉突厥沙鉢可汗常以吐氏潘姓統領之然並契丹之別種也其南者為契丹在北者號室韋南室韋在契丹北三千里

後魏書云自契丹路

經水蓋水積了山莫山周四其地卑溼至夏則移向
三百里又經屈利水到其國也西貨勃次對二山多草木饒禽獸又多蚊蚋人皆巢居
以避其患後漸分為二十五部其渠帥號餘莫不滿咄
死則子弟代之無嗣則擇賢豪而立之盤髮衣服與契
丹同乘牛車遽蔭為室如突厥羶車之狀渡水則束薪
為棧或有以皮為舟者馬則織以草為韉結繩為轡寢
則屈木為室以遽蔭覆之移則載行以猪皮為服編木
藉之氣候多寒田牧甚薄無羊少馬多猪牛言語與靺

羯相通婚嫁之法二家相許婿輒盜婦持去然後送牛
馬為聘婦人不再嫁以為死人之妻難以共居部落共
為大柵人死置屍其上居喪三年其國無鐵取給於高
麗南室韋北行十一日至北室韋分為九部落其渠帥
號乞引莫賀咄氣候最寒冬則入山居穴中牛畜多凍
死饒麋以射獵為務或沒水中而網取魚鼈地多積雪
懼陷坑穽騎木而行俗皆捕貂為業冠以狐貉衣以魚
皮又北行千里至鉢室韋依朔布山而住人衆多于北

室韋不知為幾部落用槿皮蓋屋其餘同北室韋從鉢
室韋西四日行至深末怛室韋因水為號也冬月穴居
以避太陰之氣也又西北數千里至大室韋徑路險阻
言語不同尤多貂及異鼠北室韋後魏武定隋開皇大
業中並遣使貢獻大唐有九部焉所謂嶺西室韋山北
室韋黃頭室韋大如者室韋小如者室韋娑葛室韋訥
北室韋駱駝室韋並在柳城之郡東北近者三千五百
里遠者六千二百里今室韋最西與迴鶻接界者有烏

素固部落常居俱輪國之西南次東有移塞沒部落次東又有塞曷支部落此部落有良馬人戶亦多居噉河之南其河彼俗謂之燕支河又有和解部落次東又有烏羅護部落一名烏羅渾元魏謂之烏落居磨蓋獨山北噉河之側此部落自魏太武真君四年歷北齊周隋及武德已後朝貢不絕又有邗禮部落與烏羅護犬牙而居又東北有山北室韋又有小如者室韋又北有娑葛室韋東又有嶺西室韋又東南至黃頭室韋北部落

兵強人戶亦多東北與達姑接嶺西室韋北又有訥北
支室韋此部落小烏羅護之東北百餘里那河之右有
古烏丸之遺人今亦自稱烏丸國武德貞觀中亦遣使
朝貢其國北大山之北亦有大車室韋部落其部落傍
室建河居其河源出突厥東北界俱輪國屈曲東流經
西室韋界又東經大室韋界又東經蒙兀室韋之北落
怛室韋之南又東流與那河忽汗河合又東經南黑水
靺鞨之北北黑水靺鞨之南東河注于海烏丸東南三

百里又有東室韋部落在猗越河北東南流與那河合
武德八年遣使朝貢

開元天寶中每數歲一遣使來朝及貢貂皮等物

貞元八年閏十二月室韋都督和斛熱素等一十人來
朝貢

太和五年至八年凡三遣使來朝貢九年十二月室韋
大都督阿朱等三十人來朝貢

開成元年十二月室韋大都督阿朱等三十人來朝進

馬五十匹四年正月上御麟德殿對八朝賀王室韋阿
朱等十五人其年十二月室韋大都督秩蟲等三十人
來朝貢

會昌二年十二月上御麟德殿引見室韋大首領都督
熱論等十五人宴賜有差

咸通元年正月上御紫宸殿受朝對室韋使

靺鞨

靺鞨者蓋肅慎之地也後魏謂之勿吉凡有數十部落

各有豪長而黑水靺鞨最處北方尤稱徑捷性凶悍無
憂戚無文字其畜宜豬食其肉而衣其皮渤海靺鞨本
高麗別種後徙居營州其王姓大氏名祚榮子武藝
貞觀十四年黑水靺鞨遣使朝貢以其地為黑水州

武德三年其部豪長突地稽遣使朝貢以其部置燕州
拜突地稽為總管貞觀初高開道引突厥來攻幽州突
地稽力戰有功拜左衛將軍賜姓李氏封耆國公尋卒
子謹行武力絕人麟德中累遷營州都督右領軍大將

軍為積石道經畧大使

上元三年大破吐蕃衆數萬于青海之上降璽書勞仍
賜燕國公

永淳元年卒贈幽州都督陪葬乾陵自後或有豪長自
來或遣使朝貢每歲不絕其白山部素附于高麗因收
平壤後郡衆多入于中國汨咄安居骨室等部亦因高
麗破後奔散微弱今無聞焉縱有遺人並為渤海編戶
惟黑水部全盛分為十六部落又以南北為柵

開元十三年安東都護薛泰請于黑水靺鞨內置黑水軍續更以最大部落為黑水府仍以其首領為都督諸部刺史隸屬焉中國置長史就其部落監領之十六年其都督賜姓李氏賜名獻誠授獻誠雲麾將軍兼黑水經畧使仍以幽州都督為其押使自此朝貢不絕舊說黑水西北有思慕靺鞨正北微東十日程有郡利靺鞨東北十日程有窟說靺鞨亦謂之屈說東南十日程有莫曳皆靺鞨在黑水靺鞨界南近渤海國德里府北至小

海東至大海西至室韋南北約二千里東西約一千里
其國少馬國人能步戰土多貂鼠皮尾骨咄角白兔白
鷹等初太宗謂侍臣曰韃靼遠來蓋因突厥朕之所致也
昔周宣之時獫狁孔熾出兵驅逐比之蚊蚋議者以為
中策漢武帝北事匈奴中國虛竭議者以為下策秦始皇
北築長城人神怨憤議者以為無策然則自古以來
其無上策乎朕承隋之弊而四夷歸伏無為而治得非
上策乎禮部侍郎李百藥進曰陛下以武功定四海以

文德綏萬物至道所感格于天地斯蓋二儀降福以祚
聖人豈與周漢失策校其短長哉太宗大悅其拂涅鐵
利等諸部落自國初至天寶末亦嘗朝貢或隨渤海使
而來唯郡利莫曳皆三兩部未至及渤海寢強黑水亦
為其所屬

貞元八年閏十二月渤海押靺鞨使楊吉福等三十五
人來朝貢十年二月以來朝渤海王子大清允為右武
衛將軍同正十一年十二月以靺鞨都督密阿古等二

十二人並拜中郎將放還蕃至十四年三月加渤海郡王兼驍衛大將軍忽汗州都督大嵩璘為銀青光祿大夫檢校司空冊為渤海國王依前忽汗州都督初嵩璘父欽茂以開元二十六年襲其父武藝忽汗州都督渤海郡王左金吾大將軍天寶中累加特進太子詹事寶應元年進封欽茂為渤海國王大歷中又累拜司空太尉及嵩璘嗣位但授以郡王將軍嵩璘遣使叙理故加冊命焉至元和四年以渤海國王大嵩璘男元瑜為銀

青光祿大夫檢校秘書監忽汗州都督依前渤海國王
七年十二月遣使朝貢八年又遣使朝貢十年二月黑
水豪長十一人朝貢十一年三月渤海靺鞨遣使朝貢
賜其使二十人官告

鐵勒

鐵勒者本匈奴之別種武德初有薛延陀契苾迴紇都
播骨利幹多覽葛僕骨拔野古同羅渾部思結斛薩奚
結阿跌白霫等散在磧北皆鐵勒之部內諸郡隋大業

中西突厥處羅可汗強鐵勒諸部皆臣之後處羅徵稅
無度鐵勒相率而叛歸及頡利政亂皆屬於薛延陀
貞觀二年既破延陀太宗幸靈州次涇陽縣鐵勒迴鶻
拔野古同羅僕骨多覽葛思結阿跌契丹奚渾斛薩等
十一姓各遣國歸貢獻乃稱延陀可汗不事大國暴虐
無道不能為吾輩主以自死敗部落烏散不知所之吾
等各有分地不能逐延陀去也歸命天子願賜哀憐乞
置漢官司養育是時太宗以破延陀欲遂空漠庭見其

使至甚悅遣黃門侍郎褚遂良引至縣廳浮觴積肉以禮之夜分乃散異日召鐵勒等並入行宮張樂以宴之拜為郎將及昭武校尉等官乃降璽書勞其豪長及賁綾錦等以將厚意仍遣與乘輿會于靈州并使右領軍中郎將安永壽往報焉十一月太宗至靈州鐵勒諸部俟斤頡利發等諸姓至靈州數千人咸請列其地為州縣又曰願得天至尊為臣等作可汗可汗子孫嘗為天至尊臣屬死無恨于是北荒悉平太宗為賦詩以叙其

事公卿咸請勒于石從之二十一年正月鐵勒迴紇俟
利茲等諸姓並同詣闕朝見太宗親賚其緋黃瑞錦及
標領袍鐵勒等觀而驚駭以為未嘗聞見捧戴拜謝盤
舞於塵埃中及還蕃太宗御天成殿陳十部樂而遣之
麟德中餘黨復叛

乾封元年三月鐵勒道行軍大總管右武衛大將軍鄭
仁泰左武衛大將軍薛仁貴破鐵勒之衆于天山初泰
等將發賜內宴以餞之積甲于殿前令仁貴試之帝曰

古之善射能有穿七札者卿且射五重仁貴射而撤之
帝大驚賞取甲以賜之時九姓有衆十餘萬令驍健數
千人逆來挑戰仁貴發三矢射殺三人其餘一時下馬
請降仁貴恐為後患並坑殺之更就磧北討餘衆擒其
偽葉護兄弟三人而還軍中歌曰將軍三箭定天山戰
士長歌入漢關是後遂絕

薛延陀

薛延陀者自云本姓薛氏其先擊滅延陀而有其衆因

號薛延陀其風俗與突厥同延陀乙失鉢之孫曰奚男
率其部落七萬家附于頡利頡利亂磧北諸姓多歸奚
男共推為可汗

貞觀二年太宗使喬師望冊為昆伽可汗賜之鼓纛奚
男遂建衙于大漠之北鬱督軍山下三年遣其弟統特
勒來朝上賜以寶刀及寶鞭謂曰汝所部有大罪斬之
小罪鞭之及平頡利奚男東反故國建庭于都尉犍山
北獨邏河之南即古匈奴之故地勝兵二十萬仍立其

子為南北部太宗恐其太盛冊其子皆為小可汗外示
優崇實欲分其勢也會朝廷立李思摩為可汗處其部
衆于漠南之北奚男心不悅

十五年太宗將有事太山奚男謀于國曰天子東封士
馬皆集我乘此擊思摩若拉朽耳因命其子大度設勒
兵二十萬寇白道州詔李勣薛萬徹討之大敗其衆

十六年遣使謝罪請婚許之妻以新興公主仍令備親
迎之儀太宗欲幸靈武以會之奚男竟後期不至乃絕

其婚

十七年奚男卒其後子拔灼襲位拔灼性褊其下多不附尋舉衆復寇邊

二十年三月上命夏州都督喬師望右領軍大將軍執失思力討延陀大破之斬獲二千餘人六月鐵勒僕骨同羅共擊延陀大敗之太宗以其數與思摩交兵乃降璽書責讓之又謂其使曰語爾可汗我天子能東征高麗汝若能寇邊者但當來也可汗遣使致謝請發兵來


助太宗答以優詔而止其兵及太宗拔遼東諸城破駐蹕之陣降高延壽聲震戎狄而莫離支潛令靺鞨誑惑延陀陷以厚利延陀氣懾不敢動太宗在安市城謂邊臣曰以我量之奚男其死矣聞者莫測俄然真珠毘伽可汗死其少子肆葉護殺其兄突利失可汗而自立是謂頡利俱利薛娑多彌可汗而車駕尚在遼東邊境闕備遂發兵寇夏州執失思力擊敗之多彌可汗輕騎遁走部內騷然矣多彌可汗馭下少恩廢其父時貴臣任

已親暱多所殺戮其下不附國中震恐皆不自安時太宗別令校尉宇文法詣烏羅護靺鞨部適遇延陀阿波設等于東境法乃率靺鞨進擊破之阿波設謂其國人曰唐兵至矣其衆轉相驚擾如是二旬諸部大亂多彌可汗與數十騎往投阿史那時健部落尋為迴紇所殺宗族殆盡其餘尚存五萬竄于西域而立真珠昆伽可汗猶子咄摩支為豪帥乃去可汗之號遣使奉表請居鬱督軍山之北使兵部尚書崔敦禮英國公李勣就安

輯之太宗謂曰叛則擊之勦等就至咄摩支惶駭不知所為潛謀欲戰持兩端因縱兵遣擊前後斬五千餘級獲男女二萬餘人後咄摩支入朝拜為右武衛將軍及卒太宗為發哀初延陀請以其庶長子曳莽為突利失可汗居東方所統者雜種嫡子拔灼為肆葉護可汗居西方所統者皆延陀詔許之並禮以冊命曳莽自知非正嫡部落又少恩意常不愜往往憂悚而輕用兵白道之役即曳莽唱首拔灼貳之延陀之卒皆來會焚焚屍卒

哭曳莽懼拔灼圖已先還拔灼引兵自後襲殺之延陀
以貞觀初建衙于磧北歷三主凡二十年李勣崔執禮
滅之

總章二年十二月延陀部落餘衆擾亂詔發突厥進襲
至烏羅德健山大破之



唐會要卷九十六